

տողանում էր, թէ Լալա փաշան նրանց պապերին բռնի իսլամացրել է, այլ ասում էին մոլլաներին եւ Օսմանեան վարչական փաշաներին, ականայ գնում էին մզկիթ, ուր նրանց բռնութեամբ տանում էին, ծոմը չէին պահում, լացում չէին կատարում, կրկնամուսնութիւնից խուսափում էին եւ հառաջանքով սպասում նոր յայտնութեան, յոյս ունէին ազատուել շէրիաթի ճիրաններից։ Առտնին կեանքը գրեթէ հին հայկական էր, սովորութիւնները, հագուստը անփոփոխ, նամէհրամ չունէին իրար մէջ, ծածկում էին միայն մոլլաների եւ պաշտօնեաների ներկայութեանը. հալածանքի չմատնուելու համար։ Այս գաւառների բնիկներից եւ ո՛չ մի մոլլա կամ ոստիկան-պաշտօնեայ չկային. ուրիշ գաւառներից էին գալիս սրանց կառավարելու։ Ամէն մի ընտանիքի մականունը առհմական-ժառանգական էր, — Մուխսոնց Օսմանը, Տէրտէրանց Ալին, Քաւորանց Հուսէինը, Սանահորանց Մահմէտը, Փահլեւանենց Դուրսունը եւ ուրիշները։ Ատում էին մանաւանդ տոհմական իշխանաւորներին, որոնք պետական պաշտօններ ստանձնած՝ կեղեքում էին հողագործներին։ 1879 թ. միեւնոյն բանը մեզ պատմեց Տէր-Անտոնը Կոլայի Հոգամ գիւղում. ուր բնիկները խոստովանեցին ճշմարտութիւնը, երբ Կ.Պոլսից տուն էի վերադառնում։